

# 唐才子傳注(一)

## 布目潮風

### 唐才子傳卷第一目錄

王績	崔信明	王勃	楊炯	盧照隣	駱賓王	杜審言	沈佺
期	宋之問	劉希夷	陳子昂	李百藥	李嶠	張說	王翰
吳筠	張子容	李昂	孫逖	盧鴻	王泠然	劉昫	王灣
崔顥	祖詠	儲光羲					

### 唐才子傳卷第一

陳垣元西域人華化考四。辛文房條。乾隆時纂四庫全書。始在永樂大典中。輯爲八卷。後三間草堂粵雅堂。得日本刊足本十卷。重雕之。此書遂復傳於世。○佚存叢書唐才子傳跋。唐才子傳十卷。元辛文房撰。坊刻頗多舛訛。有稱五山版。係數百年前物。審其版樣。蓋得元槧。而翻雕之。字畫精整。紕謬極少。間有其本。世稱罕選。余家舊藏一部。今據此以訂坊本之誤云。○四庫全書總目提要五十八史部傳記類二。唐才子傳八卷。永樂大典本元辛文房撰。文房字良史。西域人。其始末不見於史傳。惟陸友仁研北雜志。稱其能詩。與王執謙齊名。蘇天爵元文類中。載其蘇小小歌一篇耳。是書原本凡十卷。總三百九十七人。下至妓女道士之類。亦皆載入。其見於新舊唐書者。僅百人。餘皆從傳記說部各書採輯。其體例因詩繫人。故有唐名人。非卓有詩名者不錄。即所載之人。

亦多詳其逸事。及著作之傳否。而於功業行誼。則祇撮其梗概。蓋以論文爲主。不以記事爲主也。大抵於初盛稍略。中晚以後漸詳。至李建勳。孫魴。沈彬。江爲。廖圖。熊噉。孟賓于。孟貫。陳璋之倫。均有專傳。則下包五代矣。考楊士奇東里集。有是書跋。是明初尙有完帙。故永樂大典目錄。於傳字韻內。載其全書。今傳字一韻適佚。世間遂無傳本。然幸其各韻之內。尙雜引其文。今隨條摭拾。哀輯編次。共得二百四十三人。又附傳者四十四人。共二百八十七人。謹依次訂正。釐爲八卷。案楊士奇跋。稱是書凡行事不關大體。不足爲勸戒者不錄。又稱雜以臆說。不盡可據。今考編中。如許渾傳。稱其夢遊崑崙。李羣玉傳。稱其夢見神女。雜采孟棗本事詩。范攄雲溪友議。荒唐之說。無當史裁。又如儲光羲污祿山僞命。而稱其養浩然之氣。尤乖大義。他如謂賈賓王與宋之問。唱和靈隱寺中。謂中興間氣集爲高適所選。謂李商隱曾爲廣州都督。謂唐人學杜甫者。惟唐彥謙一人。乖舛不一而足。蓋文房鈔掇繁富。或未暇檢詳。故謬誤牴牾。往往雜見。然較計有功唐詩紀事。敘述差有條理。文筆亦秀潤可觀。傳後間綴以論。多掇摭詩家利病。亦足以津逮藝林。於學詩者考訂之助。固不爲無補焉。

西域辛文房撰

元書八十九文苑廼賞傳。又有辛文房。字良史。亦西域人。以文名。○西域人華化考四。辛文房亦有詩名。陸友研北雜誌云。王伯益執謙以字行。大名人。同時有辛文房良史。西域人。楊載仲弘。浦城人。並以能詩稱。楊仲弘集<sup>七卷</sup>有元日早朝次韻辛良史。七律一首。句曲外史集<sup>四卷</sup>亦有元日雪霽。早朝大明宮。和辛良史省郎二十二韻。辛文房詩。不多見。元文類載其蘇小小歌<sup>四卷</sup>及清明日游大傅林亭<sup>八二篇</sup>。四庫提要<sup>微記</sup>謂僅一篇者。沿池北偶談<sup>二說</sup>也。○王士禛池北偶談十二。唐才子傳條。元文類蘇小小歌一篇。

王績

舊唐書一百九十二隱逸有傳。又見新唐書一百九十六隱逸。績字無功。絳州龍門人。

新舊唐書同。○唐呂才東臯子集序。太原祁人也。高祖晉穆公。自南歸北。始家河汾焉。

文中子通之弟也。

新唐書本傳。兄通隋末大儒也。聚徒河汾間。做古作六經。又爲中說。以擬論語。不爲諸儒稱道。故書不顯。惟中說獨傳。

年十五遊長安。謁楊素。一坐服其英敏。目爲神仙童子。

那齋讀書志十七王績東臯子集條。年十五謁楊素。占對英辨。一坐盡

傾。以爲神仙童子。○楊素隋書四十八有傳。又北史四十一附楊敷傳。

隋大業末舉孝廉高第。除秘書正字。不樂在朝。辭疾。復授揚州六合縣丞。以嗜酒妨政。時天下亦亂。遂托病風。輕舟夜遁。歎曰。網羅在天。

唐才子傳注 (一)

吾將安之。乃遠故鄉。

新唐書本傳。大業中舉孝悌廉潔。授秘書正字。不樂在朝。求爲六合丞。以嗜酒不任事。時天下亦亂。因劾遂解去。歎曰。網羅在天。吾且安之。乃還鄉里。○呂才東臯子集序。大業末應孝悌廉潔。舉射高第。除秘書正字。及爲正字。端審理笏。非其好也。以疾罷。乞署外職。除揚州六合縣丞。君篤於酒德。頗妨職務。時天下亂。藩部法嚴。屢被劾。君歎曰。羅網高懸。去將安所。受俸錢。積於縣城門前。託以風疾。輕舟夜遁。

至唐武德中。詔徵。以前朝官待詔門下省。績弟靜。謂績曰。待詔可樂否。曰。待詔俸薄。况蕭瑟。但良醞三升。差可戀耳。待詔江國公聞之。曰。三升良醞。未足以絆王先生。特判日給一斗。時人呼爲斗酒學士。貞觀初。以疾罷歸。

新唐書本傳。高祖武德初。以前官待詔門下省。故事官給酒日三升。或問。待詔何樂邪。答曰。良醞可戀耳。侍中陳叔達聞之。日給一斗。時稱斗酒學士。貞觀初。以疾罷。○呂才東臯子集序。武德中詔徵。以前揚州六合縣丞。待詔門下省。時省官例日給良醞三升。君第七弟靜。爲武皇千牛。謂曰。待詔可樂否。君曰。吾待詔祿俸。殊爲蕭瑟。但良醞三升。差可戀爾。待詔江國公。君之故人也。聞之曰。三升良醞。未足以絆王先生。判日給王待詔一斗。時人號爲斗酒學士。貞觀初。以足疾罷歸。

河渚間。有仲長子光者。亦隱士也。無妻子。績愛其真。遂相近結廬。日與對酌。君有奴婢數人。多種黍。春秋釀酒。養鳧雁。蒔藥草。自供。以周易莊老置牀頭。無他用心也。自號東臯子。

新唐書本傳。有田十六頃。在河渚間。仲長子光者。亦隱者也。無妻子。結廬北渚。凡三十年。非其力不食。續愛其真。徙與相近。子光瘖。未嘗交語。與對酌酒。甚。續有奴婢數人。種黍。春秋釀酒。養鳧雁。蒔藥草。自供。以周易老子莊子置牀頭。他書罕讀也。欲見兄弟。輒度河還家。游北山東臯。著書自號東臯子。○呂才東臯子集序。鄰渚又有隱士仲長子光。服食養性。君重其貞素。顧與相近。遂結廬河渚。縱意萊酒。君又葛巾聯牛。躬耕東臯。每著書自稱東臯子。雖刺史謁見。皆不答。

新唐書本傳。刺史崔喜悅之。請相見。答曰。奈何坐召嚴君平邪。卒不詣。○呂才東臯子集序。貞觀中。京兆杜松之清河崔君善繼爲本州刺史。皆請與君相見。君曰。奈何悉欲坐召嚴君乎。竟不見。終於家。

呂才東臯子集序。貞觀十八年。終于家。性簡傲。好飲酒。能盡五斗。自著五斗先生傳。彈琴爲詩書文。高情勝氣。獨步當時。撰酒經一卷。酒譜一卷。李淳風見之曰。君酒家南董也。

新唐書本傳。其飲至五斗不亂。人有以酒邀者無貴賤輒往。著五斗先生傳。追述革酒法爲經。又采杜康儀狄以來善酒者爲譜。李淳風曰。君酒家南董也。○呂才東臯子集序曰。君性簡放。飲酒至數斗不醉。常云。恨不逢劉伶與閉戶轟飲。因著醉鄉記及五斗先生傳。君後追述雋革酒經一卷。其術精悉。兼採杜康儀狄已來善爲酒人。爲酒譜一卷。太史令李淳風見而悅之曰。王君可謂酒家之南董。○李淳風舊唐書七十九。新唐書二百四方技有傳。

及詩賦等傳世。

直齋書錄解題十六。東臯子五卷。其友呂才鳩訪遺文。編成五卷。爲之序。其後陸澹又爲後序。○案今東臯子集有孫星衍岱南閣叢書本三卷。四部叢刊續編景常熟瞿氏鐵琴銅劍樓藏明鈔本三卷。五斗先生傳。均見卷下。

#### 崔信明

信明青州人。少英敏。及長強記美文章。高孝基語人曰。崔生才冠一時。但恨位不到耳。隋大業中爲堯城令。竇建德僭號。信明弟仕賊。勸信明降節。當得美官。不肯從。遂踰城去。隱太行山中。唐貞觀六年。詔卽家拜興勢丞。遷秦川令。卒。信明恃才蹇兀。嘗自矜其文。時有揚州錄事參軍蔡陽鄭世翼。亦驚倨忤物。遇信明於江中。謂曰。聞君有楓落吳江冷之句。仍願見其餘。信明欣然多出舊製。鄭覽未終。曰。所見不逮所聞。投卷於水中。引舟而去。

新唐書卷二百一文藝上本傳。崔信明青州益都人。及長彊記美文章。鄉人高孝基。嘗語人曰。崔生才富。爲一時冠。但恨位不到耳。隋大業中。爲堯城令。竇建德僭號。而信明族弟敬素者。爲賊鴻臚卿。自謂得意。語信明曰。夏王英武。有舉天下心。士女襁負而至。不可數。兄不以此時立功立事。豈所謂見幾不俟終日乎。答曰。昔申胥海隅釣師。能固其節。爾欲吾屈身賊中。求斗筲邪。遂踰城去。隱太行山。貞觀六年有詔。卽家拜興勢丞。遷秦川令。卒。信明蹇兀。以門望自負。嘗矜其文。謂過李百藥。議者不許。揚州錄事參軍鄭世翼者。亦驚倨。數桃輕忤物。遇信明江中。謂曰。聞公有楓落吳江冷。願見其餘。信明欣然。多出衆篇。世翼覽未終。曰。所見不逮所聞。投諸水引舟去。世翼鄭州

蔡陽人。

今其詩傳者數篇而已。

案全唐詩載送金竟陵入蜀詩一首。

王勃

舊唐書一百九十上文苑。又見新唐書二百一文藝上有傳。

勃字子安。太原人。王通之諸孫也。六歲善辭章。

新唐書本傳。王勃字子安。絳州龍門人。六歲善文辭。○王通見王績條。

麟德初。劉道祥表其材。對策高第。未及冠。授朝散郎。沛王召署府修撰。時諸王鬪雞。會勃戲爲文。檄英王雞。高宗聞之。怒斥出府。勃既廢。客劍南。登山曠望。慨然思諸葛之功。賦詩見情。

新唐書本傳。麟德初。劉祥道巡行關內。勃上書自陳。祥道表于朝。對策高第。年未及冠。授朝散郎。數頌闕下。沛王聞其名。召署府修撰。

論次平臺祕略。書成。王愛重之。是時諸王鬪雞。勃戲爲文。檄英王雞。高宗怒曰。是且交構。斥出府。勃既廢。客劍南。嘗登葛嶺山曠望。慨然思諸葛亮之功。賦詩見情。○舊唐書八十六章懷太子傳。永徽

二年封潞王。龍朔元年。徙封沛王。○舊唐書七本紀中宗。中宗太和聖

昭孝皇帝。諱顯。高宗第七子。儀鳳二年。徙封英王。

又嘗匿死罪官奴。恐事洩。輒殺之。事覺。當誅。會赦除名。父福時坐是左遷交趾令。勃往省覲。

新唐書本傳。官奴曹達抵罪匿勃所。懼事洩。輒殺之。事覺。當誅除名。父福時繇雍州司功參軍。坐勃故左遷交趾令。勃往省。

唐才子傳注 (一)

途過南昌。時都督閻公。新修滕王閣成。九月九日。大會賓客。將令婿其作記。以誇盛事。勃至入謁。帥知其才。因請爲之。勃欣然對客操觚。頃刻而就。文不加點。滿座大驚。酒酣辭別。帥贈百緡。卽舉帆去。

新唐書本傳。初道出鍾陵。九月九日。都督大宴滕王閣。宿命其婿作序。以夸客。因出紙筆徧請。客莫敢當。至勃沈然不辭。都督怒起。更衣。遣吏伺其文。輒報。一再報。語益奇。乃矍然曰。天才也。請遂成文。極歡罷。○唐摭言五。以其人不稱才試而後驚條。王勃著滕王閣序。

時年十四。都督閻公不之信。勃雖在座。而閻公意屬子婿孟學士者。爲之已宿構矣。及以紙筆巡。讓賓客。勃不辭讓。公大怒。拂衣而起。專令人伺其下筆。第一報云。南昌故郡洪都新府。公曰。亦是老生常談。

又報云。星分翼軫。地接衡廬。公聞之。沈吟不言。又言。落霞與孤鶩齊飛。秋水共長天一色。公矍然而起曰。此真天才。當垂不朽矣。遂亟請宴所。極歡而罷。

至炎方。舟入洋海溺死。時年二十九。

新唐書本傳。度海溺水。瘁而卒。年二十九。

勃屬文綺麗。請者甚多。金帛盈積。心織而衣。筆耕而食。然不甚精思。先磨墨數升。則酣飲。引被覆面臥。及寤。援筆成篇。不易一字。人謂之腹藁。

新唐書本傳。勃屬文初不精思。先磨墨數升。則酣飲。引被覆面臥。及寤。援筆成篇。不易一字。時人謂勃爲腹藁。○酉陽雜俎十二語資篇。

王勃每爲碑頌。先磨墨數升。引被覆面而臥。忽起一筆書之。初不覷點。時人謂之腹藁。少夢人遺以丸墨盈袖。○唐語林二文學。王勃凡欲作文。先令磨數升。飲酒數盃。以被覆面而寢。既寤。援筆而成文。不如

點。時人謂爲腹藁也。

嘗言。人子不可不知醫。時長安曹元有秘方。勃盡得其術。又以虢州多藥草。求補參軍。倚才陵藉。僚吏疾之。

新書本傳。嘗謂人子不可不知醫。時長安曹元有祕術。勃從之游。盡得其要。聞虢州多藥草。求補參軍。倚才陵藉。爲僚吏共嫉。

有集三十卷。及舟中纂序五卷。今行於世。

新唐書六十藝文。王勃集三十卷。王勃舟中纂序五卷。○宋史二百八藝文志。王勃詩八卷。又文集三十卷。雜序一卷。王勃舟中纂序五卷。

○案今有初唐四傑集所收王子安集十六卷。四部叢刊集部所收王子安集十六卷。羅振玉輯王子安集佚文一卷。清蔣清錫撰王子安集註二十卷。

○勃嘗遇異人。相之曰。神強骨弱。氣清體羸。腦骨虧陷。目睛不全。秀而不實。終無大貴矣。故其才長。而命短者。豈非相乎。

楊炯

舊唐書一百九十上文苑有傳。新唐書附二百一文藝上王勃傳。

顯慶六年舉神童。授校書郎。永隆二年。皇太子舍奠。表豪俊。充崇文館學士。後爲益州盈川令。卒。

新唐書王勃傳。炯華陰人。舉神童。授校書郎。永隆二年。皇太子已釋奠。表豪俊。充崇文館學士。遷盈川令。卒官。○南部新書已。楊盈川

顯慶五年。待詔宏文館。年方十一。上元三年。制舉始補校書郎。尤深於宣夜之學。故作老人星賦。尤佳。

炯恃才憑傲。每恥朝士矯飾。呼爲麒麟楮。或問之。曰。今弄假麒麟戲者。必刻畫其形。覆臚上。宛然異物。及去其皮。還是臚耳。

五車韻瑞楨字引。朝野僉載。唐楊炯每呼朝士爲麒麟楮。曰。今假弄麒麟者。必修飾其形。覆之臚上。及去其皮。還是臚爾。言無德而朱紫。何以異是。

聞者甚不平。故爲時所忌。初張說以箴贈盈川之行。戒其苛刻。至官。果以酷稱。

新唐書王勃傳。張說以箴贈行。戒其苛。至官。果以嚴酷稱。吏稍忤意。榜殺之。不爲人所多。

炯博學善文。與王勃盧照隣駱賓王。以文辭齊名。海內稱四才子。亦曰四傑。效之者風靡焉。炯嘗謂。吾愧在盧前。恥居王後。

新唐書王勃傳。勃與楊炯盧照隣駱賓王。皆以文章齊名。天下稱王楊盧駱四傑。炯嘗曰。吾媿在盧前。恥居王後。議者謂然。○大唐新語八文

章。華陰楊炯。與絳州王勃。范陽盧照隣。東陽駱賓王。皆以文詞知名。海內稱爲王楊盧駱。炯與照隣則可全。而盈川之言爲不信矣。○郡

齋讀書志十七。楊炯盈川集二十卷。稱王楊盧駱四才子。張說曰。盈川文如懸河。酌之不竭。恥王後。愧盧前。謙也。

新唐書王勃傳。它日崔融與張說評勃等曰。勃文章宏放。非常人所及。炯照隣可以企之。說曰。不然。盈川文如縣河。酌之不竭。優於盧。而

不減王。恥居後。信然。愧在前。謙也。○大唐新語八文章。張說謂人曰。楊盈川之文。如懸河注水。酌之不竭。旣優於盧。亦不減王。恥居

王後。則信然。愧在盧前。則爲誤矣。有盈川集三十卷。行于世。

新唐書六十藝文志。楊炯盈川集三十卷。○案今有初唐四傑集所收楊盈川集十卷。初唐四傑文集所收楊炯文集七卷。四部叢刊集部所收景江南

圖書館藏明刊本楊盈川集十卷附錄一卷。

盧照隣

照隣字升之。范陽人。調鄧王府典籤。王愛重。謂人曰。此吾之相如也。後遷新都尉。嬰病去官。居太白山草閣。得方士玄明膏餌之。會父喪。號慟。因嘔丹輒出。疾愈甚。家貧苦。貴宦時時供衣藥。乃去具茨山下。買園數十畝。疏潁水周舍。復豫爲墓。偃臥其中。自以當高宗之時尙吏。已獨儒。武后尙法。已獨黃老。后封崧山。屢聘賢士。已已廢。著五悲文。以自明。

新唐書二百一文藝上王勃傳。照隣字昇之。范陽人。調鄧王府典籤。王愛重。謂人曰。此吾之相如。調新都尉。病去官。居太白山。得方士玄明膏餌之。會父喪號。嘔丹輒出。由是疾益甚。客東龍門山。布衣藜藿。裴璋之。韋方質。范履冰等。時時供衣藥。疾甚。足攣。一手又廢。乃去具茨山下。買園數十畝。疏潁水周舍。復豫爲墓。偃臥其中。照隣自以當高宗時尙吏。已獨儒。武后尙法。已獨黃老。后封嵩山。屢聘賢士。已已廢。著五悲文。以自明。

手足攣緩不起。行已十年。每春歸秋至。雲壑烟郊。輒輿出戶庭。悠然一望。遂自傷作釋疾文。有云。覆燾雖廣。嗟不容乎此生。亭育雖繁。恩已絕乎斯代。

幽憂子集五。釋疾文序。餘羸臥不起。行已十年。宛轉匡床。婆娑小室。未攀偃蹇桂。一臂連蹇。不學邯鄲步。兩足匍匐。寸步千里。咫尺山河。每至冬謝春歸。暑闌秋至。雲壑改色。烟郊變容。輒輿出戶庭。悠然一望。覆燾雖廣。嗟不容乎此生。亭育雖繁。恩已絕乎斯代。賦命

唐才子傳注 (一)

如此。幾何可憑。今爲釋疾文三篇。以貽諸好事。與親屬訣。自沈潁水。

新唐書王勃傳。疾既久。與親屬訣。自沈潁水。

有詩文二十卷。及幽憂子三卷。行於世。

新唐書藝文志。盧照隣集二十卷。又幽憂子三卷。○案今有初唐四傑集所收盧昇之集七卷。初唐四傑文集所收盧照鄰文集二卷。畿叢叢書初編集部所收盧昇之集七卷。四部叢刊集部所收景江安傅氏雙鑑樓藏明刊本幽憂子集七卷。附錄一卷。

駱賓王

舊唐書一百九十九上文苑有傳。新唐書附二百一文藝上王勃傳。

賓王義烏人。七歲能賦詩。武后時。數上疏言事。得罪。貶臨海丞。鞅鞅不得志。棄官去。文明中徐敬業起兵。欲反正。往投之。署爲府屬。爲敬業作檄。傳天下。暴斥武后罪。后見讀之。矍然曰。誰爲之。或以賓王對。后曰。有如此才不用。宰相過也。及敗亡命。不知所之。

新唐書王勃傳。賓王義烏人。七歲能賦詩。武后時。數上疏言事。下除臨海丞。鞅鞅不得志。棄官去。徐敬業亂。署賓王爲府屬。爲敬業傳檄天下。斥武后罪。后讀俱嘻笑。至一杯之土未乾六尺之孤安在。矍然曰。誰爲之。或以賓王對。后曰。宰相安得夫此人。敬業敗。賓王亡命。不知所之。

後宋之問貶還。道出錢塘。遊靈隱寺。夜月行吟長廊下。曰。鸞嶺鬱岿峩。龍宮隱寂寥。未得下聯。有老僧。燃燈坐禪。問曰。少年不寐。而吟諷甚苦。何耶。之問曰。欲題此寺。而思不屬。僧咲曰。何不道。樓觀滄海

日。門對浙江湖。之間終篇曰。桂子月中落。天香雲外颺。捫蘿登塔遠。剝木取泉遙。雲薄霜初下。水輕葉未凋。待入天台寺。看餘渡石橋。僧一聯。篇中警策也。遲明訪之。已不見。老僧即駱賓王也。傳聞桴海而去矣。

本事詩徵異第五。宋考功以事累貶黜。後放還。至江南。遊靈隱寺。夜月極明。長廊吟行。且爲詩曰。鷲嶺鬱岧峣。龍君隱寂寥。第二聯搜奇思。終不如意。有老僧。點長明燈。坐大禪牀。問曰。少年夜夕久不寐。而吟諷甚。苦何耶。之問答曰。弟子業詩。適偶欲題此寺。而與思不屬。僧曰。試吟上聯。即吟與之。再三吟諷。因曰。何不云。樓觀滄海日。明聽浙江湖。之間愕然。訝其造麗。又續終篇曰。桂子月中落。天香雲外颺。捫蘿登塔遠。剝木取泉遙。霜薄花更發。水輕葉未凋。待入天臺路。看餘度石橋。僧所贈句。乃爲一篇之警策。遲明更訪之。則不復見矣。寺僧有知者。曰。此駱賓王也。

後中宗詔求其文。得百餘篇。  
新唐書王勃傳。中宗時。詔求其文。得數百篇。

及詩等十卷。命鄒雲卿次序之。  
案今唐人三家集所收駱賓王文集十卷。有鄒雲卿序。  
及百道判集一卷。今傳於世。

新唐書六十藝文。駱賓王百道判集一卷。○宋史二百六藝文七。駱賓王百道判二卷。

杜審言

新唐書二百一文藝上有傳。又見舊唐書一百九十上文苑杜審言。

審言。字必簡。京兆人。預之遠裔。咸亨元年。宋守節榜進士。爲隰城尉。

特高才。傲世見疾。蘇味道爲天官侍郎。審言集判。出謂人曰。味道必死。人驚問何故。曰。彼見吾判。當羞死耳。又曰。吾文章當得屈宋作衙官。吾筆當得王羲之北面。其矜誕類此。坐事。貶吉州司戶。及武后。召還。將用之。問曰。卿喜否。審言舞踏謝。后令賦歡喜詩。稱旨。授著作郎。爲修文館直學士。卒。初審言病。宋之問武平一往省候。曰。甚爲造化小兒相苦。尙何言。然吾在。久歷公等。今日死。但恨不見替人也。少與李嶠崔融蘇味道。爲文章四友。

新唐書本傳。杜審言字必簡。襄州襄陽人。晉征南將軍預遠裔。擢進士。爲隰城尉。恃才高。以傲世見疾。蘇味道爲天官侍郎。審言集判。出謂人曰。味道必死。人驚問故。答曰。彼見吾判。且羞死。又嘗語人曰。吾文章當得屈宋作衙官。吾筆當得王羲之北面。其矜誕類此。累遷洛陽丞。坐事貶吉州司戶參軍。後武后召審言。將用之。問曰。卿喜否。審言。蹈舞謝。后令賦歡喜詩。歎重其文。授著作佐郎。遷膳部員外郎。神龍初。坐交通張易之。流峯州。入爲國子監主簿。修文館直學士。卒。初審言病甚。宋之問武平一。等省候何如。答曰。甚爲造化小兒相苦。尙何言。然吾在。久歷公等。今日死。固大慰。但恨不見替人云。少與李嶠崔融蘇味道爲文章四友。○元和姓纂六。十姥杜襄陽。魚名生依藝。鞏縣令。依藝生審言。膳部員外。有集十卷。今不存。

新唐書六十藝文。杜審言集十卷。  
但傳詩四十餘篇而已。

南宋楊萬里誠齋大全集八十二。杜必簡集序。近已旁搜遠擷。得其詩四十二首。

沈佺期

舊唐書一百九十中文苑有傳。又見新唐書二百二文藝中李適傳。

佺期。字雲卿。相州人。上元二年。鄭益榜進士。工五言。由協律考功

郎。受隸。長流驩州。後召拜起居郎。兼修文館直學士。常侍宮中。既侍

宴。帝詔學士等。爲回波舞。佺期作弄辭悅帝。詔賜牙紉。歷中書舍人。

新唐書本傳。沈佺期字雲卿。相州內黃人。及進士第。由協律郎。累除

給事中考功。受隸。劾未究。會張易之敗。遂長流驩州。稍遷臺州錄事

參軍事。入計得召見。拜起居郎兼修文館直學士。既侍宴。帝詔學士等

舞回波。佺期爲弄辭悅帝。還賜牙紉。尋歷中書舍人太子少詹事。開元

初卒。○本事詩嘲戲第七。沈佺期曾以罪謫。遇恩官還秩。朱紱未復。

嘗內晏群臣。皆歌迴波樂。撰詞起舞。因是多求遷擢。佺期詞曰。迴

波。爾時佺期流向嶺外。生歸。身名已蒙齒錄。袍笏未復牙紉。中宗卽

以紉魚賜之。○舊唐書本傳。佺期善屬文。尤長七言之作。

佺期嘗以詩贈張燕公。公曰。沈三兄詩清麗。須讓居第一也。

唐語林二文學。燕公張說嘗謂人曰。沈三兄詩。須還他第一。

詩名大振。○自魏建安迄江左。詩律屢變。至沈約鮑照庾信徐陵。以音韻

相婉附。屬對精緻。及佺期之間。又加靡麗。迴忌聲病。約句準篇。著定

格律。遂成近體。如錦綉。爲文學者宗尚。語曰。蘇李居前。沈宋比肩。

謂唐詩變體。始自二公。猶始自蘇武李陵也。

新唐書二百二文藝中宋之問傳。于時魏建安後迄江左。詩律屢變。至沈

約庾信。以音韻相婉附。屬對精密。及之問沈佺期。又加靡麗。迴忌聲

病。約句準篇。如錦繡。文學者宗之。號爲沈宋。語曰。蘇李居前。沈

宋比肩。謂蘇武李陵也。

有集十卷。今傳於世。

新唐書六十藝文。沈佺期集十卷。○宋史二百八藝文。沈佺期集十卷。

宋之問

舊唐書一百九十中文苑有傳。又見新唐書二百二文藝

之間字延清。汾州人。上元二年進士。偉貌辯給。甫冠。武后召。與楊

炯。分直習藝館。累轉尚方監丞。后遊龍門。詔從臣賦詩。左史東方虬詩

先成。后賜錦袍。之問俄頃獻。后覽之嗟賞。更奪袍以賜。

新唐書本傳。宋之問字延清。一名少連。汾州人。之問偉儀貌。雄于

辯。甫冠。武后召與楊炯分直習藝館。累轉尚方監丞。左奉宸內供奉。

武后游洛南龍門。詔從臣賦詩。左史東方虬詩先成。后賜錦袍。之問俄

頃獻。后覽之嗟賞。更奪袍以賜。

後求北門學士。以有齒疾不許。遂作明河篇。有明河可望不可親之句。以

見志。

本事詩怨憤第四。宋考功天后朝求爲北門學士。不許。作明河篇。以見

其意。末云。明河可望不可親。願得乘槎一問津。更將織女支機石。還

訪成都賣卜人。則天見其詩。謂崔融曰。吾非不知之問有才調。但以其

有口過。蓋以之間患齒疾。口常臭故也。之間終身慙憤。

諂事張易之。坐貶瀧州。後逃歸。匿張仲之家。聞仲之謀殺武三思。乃告

變。擢鴻臚簿。遷考功郎。復媚太平公主。以知舉。賄賂狼籍。下遷越州

長史。窮歷剡溪山水。置酒賦詩。日遊宴。賓客雜還。睿宗立。以無悛悟

之心。流欽州。御史劾奏。賜死。



新唐書本傳。爲易之奉溺器。及敗。貶瀧州。之問逃歸洛陽。匿張仲之家。會武三思復用事。仲之與王同峻謀殺三思安王室。之問得其實。令兄子曇與冉祖雍上急變。因巧贖罪。由是擢鴻臚主簿。天下醜其行。景龍中。遷考功員外郎。諂事太平公主。故見用。及安樂公主權盛。復往諧結。故太平深疾之。中宗將用爲中書舍人。太平發其知貢舉時賄餉狼藉。下遷汴州長史。未行。改越州長史。頗自力爲政。窮曆剡溪山。置酒賦詩。流布京師。人人傳諷。睿宗立。以獍險盈惡。詔流欽州。祖雍。歷中書舍人刑部侍郎。倡飲省中。爲御史劾奏。貶斬州刺史。至是亦流嶺南。並賜死桂州。

人言。劉希夷之報也。

案劉希夷見下。

徐堅嘗論其文。如良金美玉。無施不可。

新唐書二百一王勃傳。開元中說與徐堅論近世文章。說曰。李嶠崔融薛稷宋之問之文。如良金美玉。無施不可。○大唐新語八文章。說手疏諸人名。與堅同觀之。堅謂說曰。諸公昔年擅一時之美。敢問孰爲先後。說曰。李嶠崔融薛稷宋之問。皆如良金美玉。無施不可。

有集行世。

新唐書六十藝文。宋之問集十卷。宋史二百八藝文同。○案今四部叢刊續編集部所收景常熟瞿氏鐵琴銅劍樓藏明刊本。宋之問集二卷。增民國張元濟撰校勘記一卷。

劉希夷

希夷字廷芝。潁川人。

舊唐書一百九十中文苑喬知之傳。時又有汝州人劉希夷。○大唐新語八文章。劉希夷。一名挺之。汝州人。

上元二年。鄭益榜進士。時年二十五。射策有文名。苦篇詠。特善閨帷之作。詞情哀怨。多依古調。體勢與時不合。遂不爲所重。

舊唐書喬知之傳。善爲從軍閨情之詩。詞調哀苦。爲時所重。○大唐新語文章。少有文章。好爲宮體。詞旨悲苦。不爲時所重。

希夷美姿容。好談笑。善彈琵琶。

大唐新語文章。善摛琵琶。

飲酒至數斗不醉。落魄不拘常檢。嘗作白頭吟一聯云。今年花落顏色改。

明年花開復誰在。既而歎曰。此語譏也。石崇謂。白首同所歸。復何以異。乃除之。又吟曰。年年歲歲花相似。歲歲年年人不同。復歎曰。死生

有命。豈由此虛言乎。遂併存之。身宋之問苦愛後一聯。知其未傳於人。

懇求之。許而竟不與。之問怒其誑已。使奴以土囊壓殺於別舍。

大唐新語文章。嘗爲白頭吟。詠曰。今年花落顏色改。明年花開復誰在。既而自悔曰。我此詩似譏。與石崇白首同所歸。何異也。乃更作一句云。年年歲歲花相似。歲歲年年人不同。既而歎曰。此問復似向譏矣。然死生有命。豈復由此。乃兩存之。詩成未周。爲奸所殺。或云。

宋之問害之。○本事詩徵咎第六。詩人劉希夷嘗爲詩曰。今年花落顏色改。明年花開復誰在。忽然悟曰。其不詳歟。復過思。逾時又曰。年年歲歲花相似。歲歲年年人不同。又惡之。或解之曰。何必其然。遂兩留之。果以來春之初下世。○舊唐書喬知之傳。爲姦人所殺。

時未及三十。人恻憐之。有集十卷。及詩集四卷。

舊唐書四十七經籍。劉希夷集三卷。○新唐書六十藝文。劉希夷集十

卷。劉希夷詩集四卷。○宋史二百八藝文。劉希夷詩四卷。

今傳。○希夷天賦俊爽。才情如此。想其事業勳名。何所不至。孰謂奇蹇之運。遭逢惡人。寸祿不霑。長懷頓挫。斯才高而見忌者也。賈生悼長沙之屈。禰衡痛江夏之來。倏焉折首。夫何殞命。以隋侯之珠。彈千仞之雀。所較者輕。所失者重。

莊子九讓王。今且有人於此。以隨侯之珠。彈千仞之雀。世必笑之。何也。則其所用者重。而所要者輕也。

玉迸松摧。良可惜也。況於骨肉相殘者乎。

陳子昂

舊唐書一百九十中文苑有傳。又見新唐書一百七。

子昂字伯玉。梓州人。開耀二年。許且榜進士。

新唐書本傳。陳子昂字伯玉。梓州射洪人。文明初舉進士。○文苑英華七百九十三。盧藏用陳子昂別傳。陳子昂字伯玉。梓州射洪縣人也。本居潁州。

初年十八。時未知書。以富家子。任俠尙氣。博。後入鄉校。感悔。卽於州東南金華山觀讀書。痛自脩飾。

新唐書本傳。子昂十八。未知書。以富家子。尙氣決。博自如。日入鄉校。感悔。卽痛脩飾。○陳子昂別傳。至年十七八未知書。嘗從博徒入卿學。慨然立志。

精究墳典。耽愛黃老易象。

那齋讀書志十七陳子昂集十卷。精究墳籍。耽愛黃老易象。○陳子昂別傳。晚愛黃老之言。耽味易象。

唐才子傳注 (一)

光宅元年。詣闕上書。諫靈駕入京。

新唐書本傳。時高宗崩。將遷梓宮長安。於是關中無歲。子昂盛言。東都勝壤。可營山陵。

召見。武后奇其才。遂拜麟臺正字。

新唐書本傳。武后奇其才。召見金華殿。擢麟臺正字。

令云。地籍英華。文稱禮暉。累遷拾遺。

新唐書本傳。母喪去官。服終。擢右拾遺。○陳子昂別傳。乃救曰。梓

州人陳子昂。地籍英靈。文稱禮暉。拜麟臺正字。

聖曆初。解官歸。會父喪。廬塚次。縣令段簡貧殘。聞其富。造詐誣子

昂。脅取賂二十萬緡。猶薄之。遂送獄。子昂自筮卦。驚曰。天命不祐。

吾殆窮乎。果死獄中。年四十三。

新唐書本傳。聖曆初。以父老表解官歸侍。詔以官供養。會父喪。廬塚次。每哀慟。聞者爲涕。縣令段簡貧暴。聞其富。欲害子昂。家人納錢

二十萬緡。簡薄其賂。捕送獄中。子昂之見捕。自筮卦成。驚曰。天命

不祐。吾殆死乎。果死獄中。年四十三。○陳子昂別傳。縣令段簡。貧

暴殘忍。聞其家有財。乃附會文法。將欲害之。子昂荒懼。使家人納錢

二十萬。而簡意未塞。數與曳就吏。子昂素羸疾。又哀毀。杖不能起。

外迫苛政。自度力氣。恐不能全。因命著自筮卦成。仰而號曰。天命不

祐。吾其死矣。於是遂絕。年四十二。

子昂貌柔雅。爲性褊躁。輕財好施。篤朋友之義。唐興。文章承徐庾餘風。

天下祖尙。子昂始變雅正。初爲感遇詩三十章。王適見而驚曰。此子必爲

海內文宗。猶是知名。凡所著論。世以爲法。

新唐書本傳。子昂貌柔野。少威儀。子昂資褊躁。然輕財好施。篤朋

友。與陸餘慶王無競房融崔泰之盧藏用趙元最厚。唐興。文章承徐庾餘風。天下祖尚。子昂始變雅正。初為感遇詩三十八章。王適曰。是必為海內文宗。乃請交。子昂所論著。當世以為法。○陳子昂別傳。王適見而驚曰。此子必為文宗矣。○王適舊唐書一百九十中附文苑劉憲傳。

詩調尤工。嘗勸后。興明堂太學。以調元氣。

新唐書本傳。垂拱初。詔問羣臣。調元氣。當以何道。子昂因是勸后。

興明堂太學。

與遊英俊。多秉權衡。柳公權評曰。能極著述。克備比興。唐興以來。子昂而已。

郡齋讀書志十七。陳子昂集十卷。柳儀曹曰。張說以著述之餘。攻比

興。而莫能極。張九齡以比興之暇。窮著述。而不克備。唐興以來。稱

是選而不作者。子昂一人而已。○柳公權舊唐書一百六十五柳公綽。新

唐書一百六十三柳公綽附傳。

有集十卷。今傳。

案今四部叢刊集部所收陳伯玉文集十卷。景秀水王氏二十八宿研齋藏明

弘治楊澄刊本。

○嗚呼。古來材大。或難為用。象以有齒。卒焚其身。信哉。子昂之謂歟。

左傳襄公二十四年。象有齒。以焚其身賄也。

### 李百藥

舊唐書七十二。新唐書一百二有傳。○新唐書七十二宰相世系表。漢中

李氏。百藥禮部侍郎宗正卿安平公。

百藥字重規。定州人。幼多病。祖母以百藥名之。七歲能文。襲父德林

爵。

新唐書本傳。李百藥字重規。定州安平人。隋內史令德林子也。幼多

病。祖母趙以百藥名之。七歲能屬文。開皇十九年召見仁壽宮。襲父爵

安平公。○李德林隋書七十二有傳。

會高祖招杜伏威。百藥勸朝京師。中道而悔。怒飲以石灰酒。因大利幾

死。既而宿病皆愈。貞觀中。拜中書舍人。遷太子庶子。

新唐書本傳。會高祖遣使。招伏威。百藥勸朝京師。既至歷陽。中悔欲

殺之。飲以石灰酒。因大利瀕死。既而宿病皆愈。貞觀元年。拜中書

舍人。四年授太子右庶子。○杜伏威舊唐書五十六。新唐書九十二有

傳。

嘗侍帝。同賦帝京篇。手詔褒美曰。卿何身老而才之壯。齒宿而意之新乎。

新唐書本傳。帝嘗與偕賦帝京篇。歎其工。手詔曰。卿何身老而才之

壯。齒宿而意之新乎。○大唐新語八文章。太宗常製帝京篇。命其和

作。歎其精妙。手詔曰。卿何身之老而才之壯。何齒之宿而意之新。

百藥才行。天下推服。好獎薦後進。翰藻沈鬱。詩尤所長。

新唐書本傳。百藥名臣子。才行世顯。為天下推重。好獎薦後進。得俸

祿與親黨共之。翰藻沈鬱。詩尤其所長。

有集傳世。

舊唐書四十七經籍。新唐書六十藝文。李百藥集三十卷。

### 李嶠

舊唐書九十四。新唐書一百二十三有傳。

嶠字巨山。趙州人。十五通五經。二十擢進士。累遷為監察御史。武后

時。同鳳閣鸞臺平章事。後因罪貶廬州別駕卒。嶠富才思。有所屬綴。人  
輒傳諷。

新唐書本傳。李嶠字巨山。趙州贊皇人。十五通五經。二十擢進士第。

授監察御史。武后時。進麟臺少監同鳳閣鸞臺平章事。改廬州別駕。

卒。年七十。嶠富才思。有所屬綴。人多傳諷。

明皇將幸蜀。登花萼樓。使樓前善水調者。奏歌。歌曰。山川滿目淚霑

衣。富貴榮華能幾時。不見只今汾水上。惟有年年秋鴈飛。帝慘愴移時。

顧侍者曰。誰爲此。對曰。故宰相李嶠之詞也。帝曰。眞才子。不待終曲

而去。

本事詩事感第二。天寶末玄宗嘗乘月登勤政樓。命梨園弟子歌數闕。有

唱李嶠詩者。云。富貴榮華能幾時。山川滿目淚霑衣。不見祇今汾水

上。唯有年年秋鴈飛。時上春秋已高。問是誰詩。或對曰。李嶠。因淒

然涕下。不終曲而起曰。李嶠眞才子也。○唐詩紀事十李嶠。山川滿目

淚霑衣。富貴榮華能幾時。不見只今汾水上。惟有年年秋鴈飛。天寶

末。明皇乘春登勤政樓。命梨園弟子歌數闕。有唱歌。至富貴榮華能幾

時以下四句。帝春秋衰邁。問誰詩。或對李嶠。因淒然涕下。遽起曰。

嶠眞才子也。及其年幸蜀。登白衛嶺。覽眺良久。又歌是詞。復曰。嶠

誠才子也。

嶠前與王勃楊炯接。中與崔融蘇味道齊名。晚諸人沒。爲文章宿老。學者

取法焉。

新唐書本傳。前與王勃楊盈川接。中與崔融蘇味道齊名。晚諸人沒。而

爲文章宿老。一時學者取法焉。

今集五十卷。雜詠詩十二卷。單提詩一百二十首。張方爲註。傳於世。

唐才子傳注 (一)

舊唐書四十七經籍。李嶠集三十卷。新唐書六十藝文。李嶠集五十卷。

李嶠雜詠詩十二卷。○宋史二百八藝文。李嶠詩十卷。李嶠新詠一卷。

○那齋讀書志十七李嶠集本六十卷。未見。今所錄一百二十詠而已。

或題曰。單題詩。有張方法。○案今佚存叢書有李嶠雜詠二卷。

張說。

舊唐書九十七。新唐書一百二十五有傳。又見新唐書七十二下宰相世系

表張氏條。○唐丞相曲江張先生文集十八燕國公贈太師張公墓志銘。

說字道濟。洛陽人。

新唐書本傳。張說字道濟。或字說之。其先自范陽徙河南。更爲洛陽

人。

垂拱四年。舉學綜古今科。中第三等。考策日。封進授太子校書。令曰。

張說文思清新。藝能優洽。金門對策。已居高科之首。銀榜效官。宜中一

命之秩。

徐松登科記考三。垂拱四年。記纂淵海引登科記。永昌九年應學綜古今

科一人。張說第三等。考策日。封進。令曰。洛陽人張說。文詞清典。

藝能優洽。金門對策。已居高科之首。銀榜效官。且加一命之秩。

後累遷鳳閣舍人。睿宗時。兵部侍郎。平章事。

那齋讀書志十七。張說集三十卷。累遷鳳閣舍人。睿宗時。兵部侍郎平

章事。○新唐書本傳。擢鳳閣舍人。中宗立。召爲兵部員外郎。累遷工

部兵部二侍郎。睿宗即位。踰年進同中書門下平章事。

開元十八年。終左丞相燕國公。

那齋讀書志。張說集。開元十八年終左丞相燕國公。○新唐書本傳。皇

太子卽皇帝位。召爲中書令。封燕國公。開元十七年。復爲右丞相。遷左丞相。

說敦氣節。重然諾。爲文精壯。長於碑誌。朝廷大述作。多出其手。詩法特妙。晚謫岳陽。詩益悽婉。人謂得江山之助。

新唐書本傳。說敦氣節。立然許。爲文屬思精壯。長於碑誌。朝廷大述作。多出其手。旣謫岳州。而詩益悽婉。人謂得江山之助云。

今有集三十卷。

新唐書六十藝文。張說集三十卷。○宋史二百八藝文。張說集三十卷。

又外集二卷。○案今張說之文集二十五卷。有武英殿聚珍版本朱氏賸餘

叢書本。四部叢刊。景明喜靖丁酉刊本。

行于世。子均。開元四年進士。亦以詩鳴。

新唐書本傳。子均埴。均亦能文。

王翰。

舊唐書一百九十中文苑。新唐書二百二文藝中有傳。舊唐書翰作瀚。

翰字子羽。并州人。景雲元年。盧逸下進士及第。又舉直言極諫。又舉超

拔群類科。少豪蕩。恃才不羈。喜縱酒。

新唐書本傳。王翰字子羽。并州晉陽人。小豪健恃才。及進士第。然喜

蒲酒。復舉直言極諫。又舉超拔群類。

歷多名馬。家畜妓樂。翰發言立意。自比王侯。日聚英傑。縱禽擊鼓爲歡。

舊唐書本傳。歷多名馬。家有妓樂。翰發言立意。自比王侯。日聚英

豪。從禽擊鼓。恣爲歡賞。

張嘉貞爲本州長史。厚遇之。翰酒間自歌舞。屬嘉貞。神氣軒舉。張說尤加禮異。及輔政。召爲正字。擢駕部員外郎。說罷。翰出爲仙州別駕。以窮樂飲。貶嶺表。道卒。

新唐書本傳。張嘉貞爲本州長史。偉其人厚遇之。翰自歌以舞。屬嘉貞。神氣軒舉自如。張說至。禮益加。方說輔政。故召爲祕書正字。擢

通事舍人駕部員外郎。說罷宰相。翰出爲汝州長史。徙仙州別駕。日與才子豪俠。飲樂游飲。伐鼓窮歡。坐貶道州司馬。卒。

翰工詩。多壯麗之詞。文士祖詠。杜華等嘗與遊從。華母崔氏云。吾聞孟母三遷。吾今欲卜居。使汝與王翰爲鄰足矣。其才名如此。

集千家註杜工部集一。奉贈韋左丞文二十二韻。王翰願卜隣注。王翰文士也。杜華嘗與遊從。華母崔氏云。吾聞孟母三徙。吾今欲卜居。使汝

與王翰爲隣。○舊唐書本傳。文士祖詠杜華等常在座。案祖詠見下。燕公論其文。如瓊杯玉斝。雖爛然可珍。而多玷缺云。

新唐書二百一文藝。王勃傳。說曰。王翰如瓊杯玉斝。雖爛然可珍。而多玷缺。○大唐新語八文章。說曰。王翰之文。有如瓊林玉斝。雖爛然

可珍。而多有玷缺。

有集今傳。

新唐書六十藝文。王翰集十卷。

○太史公恨古布衣之俠。湮沒無聞。以其義出存亡生死之間。而不伐其德。千金駟馬。纒膏草芥。信哉。名不虛立也。

史記一百二十四游侠列傳。已諾必誠。不愛其軀。赴士之阨困。旣已存亡死生矣。自秦以前。匹夫之之俠。湮滅不見。余甚恨之。名不虛立。

士不虛附。

觀王翰之氣。其若人之儔乎。

吳筠。

舊唐書一百九十二隱逸。新唐書一百九十六隱逸有傳。又見道藏太玄部權德輿撰吳尊師傳。

筠字貞節。華陰人。通經義。美文辭。舉進士不中。隱居南陽倚帝山。爲道士。天寶中。玄宗遣使。詔至京師。與語甚悅。勅待詔翰林。獻玄綱三篇。帝問道。對曰。深於道者。惟老子五千言。其餘徒費紙札耳。復問神仙治鍊之術。曰。此野人之事。積歲月求之。非人主所宜留意。筠每陳設名教世務。帝重之。

新唐書本傳。吳筠字貞節。華州華陰人。通經誼。美文辭。舉進士不中。於時去居南陽倚帝山。天寶初。召至京師。玄宗遣使。召見大同殿。與語甚悅。勅待詔翰林。獻玄綱三篇。帝嘗問道。對曰。深於道者。無如老子五千言。其餘徒費紙札耳。復問神仙治鍊法。對曰。此野人事。積歲月求之。非人主宜留意。筠每開陳。皆名教世務。以微言諷天子。天子重之。○吳尊師傳。玄宗聞其名。遣使徵之。既至。與語甚悅。令待詔翰林。帝問以道法。對曰。道法之精。無如五千言。其諸枝詞蔓說。徒費紙節爾。又問。神仙修鍊之事。對曰。此野人之事。當以歲月功行求之。非人主所當適意。每與緇黃列坐。朝臣啓奏。筠之所陳。但名教世務而已。聞之以諷詠。以達其誠。玄宗深重之。

初筠愛會稽山水。往來天臺剡中。與李白孔巢父相遇酬唱。那齋讀書志十七。吳均宗元先生集十卷。乃東遊會稽。往來天臺剡中。與李白孔巢父酬唱。○吳尊師傳。乃東遊會稽。嘗於天臺剡中往來。與

詩人李白孔巢父。詩篇酬和逍遙。○孔巢父舊唐書一百五十四。新唐書一百六十三有傳。

至是因薦於朝。帝卽遣使召之。筠性高鯁。其待詔翰林時。恃承恩顧。高力士素奉佛。嘗短筠於上前。筠故多著賦文。深詆釋氏。頗爲通人所譏云。那齋讀書志。吳筠宗元先生集。性高鯁。其待詔翰林也。特承恩顧。高力士素奉佛。嘗短筠於帝。故筠所著文賦。深詆釋氏。頗爲通人所譏云。○舊唐書本傳。筠在翰林時特承恩顧。繇是爲群僧之所嫉。驟騎高力士素奉佛。嘗短筠于上前。筠不悅。乃求還山。故所著文賦。深詆釋氏。亦爲通人所譏。

後知天下將亂。苦求還崧山。詔爲立道觀。

新唐書本傳。筠亦知天下將亂。懇求還崧山。詔爲立道觀。

大曆間卒。弟子謚爲宗元先生。

新唐書本傳。大曆十三年卒。弟子私謚爲宗元先生。

善爲詩。有集十卷。權德輿序之。

新唐書六十藝文。吳筠集十卷。○那齋讀書志十七。吳筠宗元先生集十卷。右唐吳筠撰。前有權德輿序。○宋史二百八藝文。吳筠集十一卷。

○案今道藏太玄部所收宗元先生文集三卷。有權德輿序。

張子容

子容襄陽人。開元元年常無名榜進士。仕爲樂城令。初與孟浩然。同隱鹿門山。爲死生交。

唐詩紀事二十三張子容。子容先天二年進士。曾爲樂城尉。與孟浩然友善。

詩篇唱答頗多。後值亂離。流寓江表。嘗送內兄李錄事歸故里云。十年多難與君同。幾處移家逐轉蓬。白首相逢征戰後。青春已過亂離中。行人杏杏看西日。歸馬蕭蕭向北風。漢水楚雲千萬里。天涯此別恨無窮。後竟棄官歸舊業。有詩集。興趣高遠。略去凡近。當時哲匠咸稱道焉。

李昂。

昂開元二年。王丘下狀元及第。

佚存叢書丘作立。登科記考五。開元二年。永樂大典賦字韻注云。開元

二年王邱員外貢舉。

天寶間仕為禮部侍郎。知貢舉。

唐會要七十五。開元八年七月王丘為吏部侍郎。拔擢進士李昂等。不數

年登禮闈。掌綸誥焉。

獎拔寒素甚多。工詩。有戚夫人楚舞歌一篇。

唐詩紀事十七李昂。昂賦戚夫人楚舞歌。

播傳人口。真佳作也。

孫逖。

舊唐書一百九十中文苑。新唐書二百二文藝有傳。

遼博州人。幼而有文。屬思警敏。授筆成篇。開元二年。舉手筆俊。哲人

奇士。隱淪屠釣。及文藻宏麗等科第一人及第。玄宗引見。擢左拾遺。集

賢殿修選。改考功員外郎。遷中書舍人。與顏真卿。李華。蕭穎士皆同

時。稱海內名士。仕終刑部侍郎。

新唐書二百二本傳。孫逖博州武水人。遼幼有文。屬思警敏。年十五見

雍州長史崔日用。令賦土火爐。授筆成篇。舉手筆俊拔。哲人奇士。隱淪屠釣。及文藻宏麗等科。玄宗御洛城門引見。擢左拾遺。入為集賢院脩撰。改考功員外郎。取顏真卿李華蕭穎士趙驥等。皆海內有名士。俄遷中書舍人。居職八年。判刑部侍郎。

善詩古調今格。悉其所長。集二十卷今傳。

新唐書六十藝文。孫逖集二十卷。○宋史二百六藝文。孫逖集二十卷。

盧鴻。

新唐書一百九十六隱逸有傳。舊唐書一百九十二作盧鴻一。

鴻字浩然。隱居崑山。博學。

新唐書本傳。盧鴻字顯然。其先幽州范陽人。徙洛陽。博學善書。盧

嵩山。

善八分書。工詩。兼畫山水樹石。

歷代名畫記九。盧鴻一名浩然。高士也。工八部書。善畫山水樹石。

開元初玄宗儲禮徵。再三不至。詔曰。鴻有泰一之道。中庸之德。鈞深詣

微。確乎自高。詔書屢下。每輒辭託。使朕虛心引領。于今有年。雖得素

履幽人之介。而失考父滋恭之誼。禮有大倫。君臣之義。不可廢也。有司

其齋束帛之具。重宣茲旨。想其翻然易節。副朕意焉。鴻遂至東都。謁見

不拜。宰相問狀。答曰。禮者忠信所薄。臣敢以忠信見。帝召升內殿。置

酒。拜諫議大夫。固辭。復下詔。許還山。

新唐書本傳。玄宗開元初備禮徵。再不至。五年詔曰。鴻有泰一之道。

中庸之德。鈞深詣微。確乎自高。詔書屢下。每輒辭託。使朕虛心引

領。于今數年。雖得素履幽人之介。而失考父滋恭之誼。禮有大倫。君

臣之義。不可廢也。有司其齎東帛之具。重宣茲旨。想有以翻然易節。顯而終。有集今傳。

副朕意焉。鴻至東都。謁見不拜。宰相遣通事舍人問狀。答曰。禮者忠信所薄。臣敢以忠信見。帝召升內殿。置酒。拜諫議大夫。固辭。復下制許還山。○大唐新語十隱逸。玄宗徵嵩山隱士盧鴻。三詔乃至。及謁見不拜。但馨折而已。問其故。鴻對曰。臣聞。老子云。禮者忠信之薄。不足可依。山臣鴻敢不忠信奉見。玄宗異之。詔入賜讎。拜諫議大夫。賜以章服。辭不受。乃給米百石。絹五百疋。還隱居之所。

將行。賜隱居服。官營草堂。鴻到山中。廣精舍。從學者五百人。及卒。詔賜萬錢營葬。

新唐書本傳。將行。賜隱居服。官營草堂。恩禮殊渥。鴻到山中。廣學廡。聚徒至五百人。及卒。帝賜萬錢。

後皮日休爲七愛詩。謂做大君者。必有真隱。盧徵君是也。

皮日休文集十。七愛詩序。做大君者。必有真隱。以盧徵君爲真隱焉。工詩。今傳甚多。

王泠然。

泠然山東人。開元五年。裴耀卿下進士。授將仕郎。守太子校書郎。

唐摭言六。將仕郎守太子校書郎王泠然。謹再拜上書相國燕公閣下。長安令裴耀卿。於開元五年。掌天下舉擢。僕高弟。以才相知。○羅繼祖

登科記考補(東方學報京都第十三册第四分)。開元五年。王泠然。(補注)右威衛兵曹參軍王泠然墓誌。字仲清。太原人也。七歲見稱於鄉黨。廿則賓於王庭。以秀才擢第。授東宮校書郎。

工文賦詩。氣質豪爽。當言無所回忌。乃卓犖奇才。濟世之器。惜其不大

唐才子傳注(一)

劉沓虛。

沓虛崧山人。全唐詩九劉沓虛。江東人。姿容秀拔。九歲屬文。上書。召見拜童子郎。開元十一年徐徵榜進士。登科記考八。開元二十一年。進士二十五人。徐徵狀元。調洛陽尉。遷夏縣令。性高古。脫略勢利。嘯傲風塵。後欲卜隱廬阜。不果。交遊多山僧道侶。爲詩。情幽興遠。思雅詞奇。忽有所得。便驚衆聽。當時東南高唱者數十人。聲律婉態。無出其右。唯氣骨不逮諸公。永明已還。端可傑立江表。善爲方外之言。夫何不永。天碎國寶。有志不就。惜哉。集今傳世。

河嶽英靈集上。沓虛詩情幽興遠。思苦語奇。忽有所得。便驚衆聽。東南高唱者數人。然聲律宛態。無出其右。唯氣骨不逮諸公。自永明已還。可傑立江表。並方外之言也。惜其不永。天破國寶。

王灣。

灣開元十一年。常無名榜進士。

唐詩紀事十五王灣。灣先天進士第。○先見張子容。開元元年。常無名榜進士。案十一年當作元年。

與學士慕母潛契切。詞翰早著。爲天下所稱。往來吳楚間。多有著述。如江南意一聯云。海日生殘夜。江春入舊年。詩人以來。罕有此作。張燕公手題於政事堂。每示能文。令爲楷式。

一八九



河嶽英靈集下。灣詞翰早著。爲天下所稱。最者不過一二。遊吳中。作江南意詩云。海日生殘夜。江春入舊年。詩人以來。少有此句。張燕公。手題政事堂。每示能文。令爲楷式。

會奉使。登終南山。有賦。

唐詩紀事十五。奉使登終南山。詩云。常愛南山遊。因而盡原隰。志趣高遠。識者不能棄焉。

崔顥。

顥汴州人。開元十一年。源少良下及進士第。天寶中。爲尚書司勳員外郎。

新唐書六十藝文志。崔顥詩一卷。汴州人。歷司勳員外郎。○新書二百

三文藝孟浩然傳。崔顥者。亦擢進士第。有文無行。終司勳員外郎。○

直齋書錄解題十九。崔顥集一卷。唐司勳員外郎崔顥撰。開元十年進

士。才俊無行。黃鶴樓詩。盛傳於世。

少年爲詩。意浮艷。多陷輕薄。晚節忽變常體。風骨凜然。一窺塞垣狀。

極我旅奇造。往往並驅江鮑。

河嶽英靈集中。顥年少爲詩。名陷輕薄。晚節忽變常體。風骨凜然。一

窺塞垣。盡戎旅。可與鮑昭並驅也。

後遊武昌。登黃鶴樓。感慨賦詩。及李白來曰。眼前有景道不得。崔顥題

詩在上頭。無作而去。爲哲匠斂手云。

唐詩紀事二十一。崔顥。黃鶴樓詩。昔人已乘白雲去。此地空餘黃鶴

樓。黃鶴一去不復返。白雲千載空悠悠。晴川歷歷漢陽樹。芳草萋萋鸚

鵝洲。日暮鄉關何處是。煙波江上使人愁。世傳。太白云。眼前有景道

不得。崔顥題詩在上頭。遂作鳳凰臺詩。以較勝負。恐不然。

然行履稍劣。好蒲博嗜酒。娶妻擇美者。稍不愜。卽棄之。凡易三四。初

李邕聞其才名。虛舍邀之。顥至獻詩。首章云。十五嫁王昌。邕叱曰。小

兒無禮。不與接而入。

新唐書孟浩然。崔顥好蒲博嗜酒。娶妻惟擇美者。俄又棄之。凡四五娶。

初李邕聞其名。虛舍邀之。顥至獻詩。首章曰。十五嫁王昌。邕叱曰。

小兒無禮。不與接而去。○案五山版本。佚存叢書本。蒲字當作蒲。

顥苦吟詠。當病起清虛。友人戲之曰。非子病如此。乃苦吟詩瘦耳。遂爲

口實。天寶十三年卒。有詩一卷。

宋史二百六藝文。崔顥詩一卷。

今行。

祖詠。

詠洛陽人。開元十二年。杜綰榜進士。

直齋書錄解題十九。祖詠集一卷。唐祖詠撰。開元十二年進士。

有文名。商潘評其詩。剪刻省靜。用思尤苦。氣雖不高。調頗凌俗。足稱

爲才子也。

河嶽英靈集下。祖詠。詠詩剪刻省靜。用思尤苦。氣雖不高。調頗凌

俗。亦可稱爲才子也。

少與王維爲吟侶。維在濟州。寓官舍。贈祖三詩有云。結交三十載。不得

一日展。貧病子旣深。契闊餘不淺。

趙殿成本王右丞集三贈祖三詠。濟州官舍作。

蓋亦流落不偶。極可傷也。後移家。歸汝墳間別業。以漁樵自終。

全唐詩五祖詠。汝墳別業。失路農爲業。移家到汝墳。獨愁常廢卷。多病久離羣。鳥雀垂慙柳。虹霓出澗雲。山中無外事。樵唱有時聞。有詩一卷。

新唐書藝文。祖詠詩一卷。傳於世。

儲光羲。

光羲兖州人。開元十四年。殿廸榜進士。有詔中書試文章。嘗爲監察御史。值安祿山陷長安。輒受僞署。賊平後自歸。貶死嶺南。

新唐書五十九藝文。子部儒家類。儲光羲正論十五卷。兖州人。開元進

士第。又詔中書試文章。歷監察御史。安祿山反。陷賊。自歸。○郡齋讀書志十七。儲光羲集五卷。右唐儲光羲。魯人。開元十四年進士第。嘗爲監察御史。後從安祿山僞署。賊平貶死。

工詩。格高調逸。趣遠情深。削盡常言。挾風雅之道。養浩然之氣。

河嶽英靈集中。儲光羲詩。格高調逸。趣遠情深。削盡常言。挾風雅之道。養浩然之氣。

覽者猶聽韶濩音。先洗桑維耳。庶幾乎賞音也。有集七十卷。

新唐書藝文。儲光羲集七十卷。郡齋讀書志十七。儲光羲集五卷。正論十五卷。九經分義疏二十卷。並傳。

河嶽英靈集中。正論十五卷。九經外義疏二十卷。